

Esta Ko'i Bestia!

Trint'i ocho científiko di New Zealand ta pone preshon riba nan gobernantenan pa duna makakunan e mésun derechunan básiko ku hende tin.

E idea aki a originá ku un grupo di científiko ku algun aña pasá a skirbi un buki entitulá *The Great Ape Project: Equality Beyond Humanity* (Proyekto Makaku: Igualdat Mas Aya ku Humanidat). E buki ta yega na konklushon ku **mester rekonosé makakunan komo “personanan no-humano” i ku makakunan mester tin e mésun derechunan moral i legal ku sernan humano**. Nan ta argumentá ku esaki ta lógiko pasobra entre otro e DNA di chimpasé ta solamente 2% diferente for di esun di e ser humano. Ademas, makakunan ta demonstrá siertu abilidadat pa komuniká i resolvé problemanan, i talabes tin emoshon manera hende. Nan a skirbi: “Nos ta demandá pa ekstendé e komunidad di sernan igual pa inkluí tur makaku: sernan humano, chimpansé, gorila, i orangután.”

Otro científiko, inspirá pa e proyekto aki, ta pone preshon riba Nashonnan Uní pa aprobá un deklarashon ku lo garantisá makakunan e derechu di bida, libertat, i libertat di tortúra.

Esta ko'i bestia! Ma kòrda, nan ideanan ridíkulo ta harmonisá total ku e teoria di evolushon. Si ta bèrdat, manera evolushon ta siña, ku hende ta desendiente di makaku, anto ta lógiko pa kuestioná pakiko hende por tin mas derechu ku makaku. Hende ta demasiado arogante pa gosa libertatnan ku nan ta nenga makakunan.

New Zealand ta forma parti di un otro evento den notisia e siman aki. Un dama merikano ku ta traha na Antártika (sùit pol) ta sufrí di kanser. Ma no ta pusíbel pa dun'é tratamentu médiko mas atvansá pasobra ta tempu di wenter na Antártika. Debí ku tin skuridat 24 ora pa dia i temperaturanan ta inkreíbelmente friu, ta impusíbel pa avion baha reskat'é pa algun luna.

Pa skapa bida di e dama, Merka a paketá aparatonan médiko i remedi den kahanan i pone nan abordo di un avion. E avion a biaha pa New Zealand...un distansia formal. For di aya, e avion a bula pa Antártika, laga e kahanan kai for di e avion na un haltura di 230 meter, regresá na New Zealand i sigui pa Merka. Na Antárika nan tin ku rekobrá e kahanan dentro di sinku minüt promé ku su contenido ta fris. Henter e proyekto a kosta Merka \$1 mión i a pone bida di 30 tripulante na peliger.

Tantu esfuerso i gastu pa skapa bida di un ser humano! Esei ta kompletamente na su lugá! Ma si nos aseptá ku hende ta desendiente di makaku i ku makaku tin derechu igual ku e ser humano, anto pronto nos lo tende den notisia di mas aventura riskante...pa skapa bida di 1 solo chimpasé! Si teoria di evolushon ta bèrdat, ta lógiko pa pone bida di 30 ser humano na peliger i gasta \$1 mión pa reskatá e 1 pobersito makaku.

Si teoria di evolushon ta bèrdat, i makaku tin derechu moral i legal igual ku hende, esei ta lamta hopi pregunta. Tur makaku lo haña libertat? Ta sera makaku ku ta kohe kos di otro makaku? Ta pone makaku bisti paña segun nos leinan moral? I si nos ta duna makaku e derechunan aki, pakiko no duna sapu e mésun derechunan? Makaku tòg ta desendiente di sapu!

En kontraste di ideanan evolushonista estúpido, Beibel ta proklamá un mensahe símpel ku ta mil bes mas rasonabel: 1) Dios a krea tur kos inkluiendo tur bestia, 2) Dios a krea hende distinto, den Su mes imagen, 3) Dios a hasi hende responsabel pa atministrá i kuida e bestianan. “Dios a krea hende segun Su mes imagen... Dios a bisa nan: ‘...goberná riba e piskánan di laman i riba e parhanan di shelu, i riba tur ser bibu ku ta move riba tera.’” (Génesis 1:26-27) Kreashon i su implikashonnan ta tur lógiko ku por ta. Esei si no ta ko'i bestia!